

Parosifa erup fain Pita-ke siisimok

Miimow opora

Wi somek mua papako-ke ikiwep wi Kristen opor wadola onami wia peeskimemik. Naapeya Pita-ke parosifa fain wi Kristen teeria wia siisimomak. Wi Yeesus opora wiar opap ikemik nain ne sira eliwa onam-ikemik nain me piipuaok, ne wi somek mua samora nain me wiokuk naep. Wi aposel opor eliwa wia maakemik nain wiar opap kekanep ikok Mua Maneka ne yiena Maneka Yeesus Krai baliwep amisarikuan naek. Wi aposel nain wiena mokok onaiya Yeesus urufami ifan onaiya o opora maem-ikua nain miimamik naek.

Wi mua papako-ke maemik, Yeesus nainiw me ekapinon. Naap maiwkin Pita feenap wia maakek, maken akena, Yeesus ikoka ekapinon, nain ewur me ekapinon. Moram Mua Maneka mua unow onaiya iiwawun kema kirep yena pika kemena-pa efar ikauk naek. Mua kuisow sisina-pa me ikainok naek. Naapeya nain wia arewami ewur akena me ekapinon.

1 ¹Aria parosifa fain yo Saimon Pita eena Yeesus Krai uuwow mua ne aposel nain-ke ni teeria fain nia siisimomiyem. Ni feenap, Yeesus Krai yiena Mua Maneka-ke, ne ni pina-pa ikaiwkin ona nia aaweya Mua Maneka mokoka-pa pina marew ikeman. Naeya i teeria epaskun opor eliw akena nain opimik. ²Ni feenap nia maiyem, ni Mua Maneka ne yiena Maneka Yeesus Krai amisar-ikim-ikaiman neeke Mua Maneka nia kemaliya nain niam furewami kema sonom eliwa manek akena aawowen.

Mua Maneka ona yia pepekimok

³Ona kekanowa-pa kema yiemi yia pepekwaweya i anane o wameiya eliwa ikok ekima maneka opami eliwa ikaiyen. Mua Maneka yena kaken eliwa ne yena unum maneka ikem nain nis pun naap ikeka naep yia maiya. I o naap amisaremik nan kekanowa aawemik. ⁴Ona naap onami maa ele-eliwa yia onomowa maep koonowak nain makena yia opomak. Neeke ona sira dubil manekiw ikaiya nain nis pun naap ikowen. Naeya mia kookalowa sira-sira eena nia samoriya nain eliw ao-wuepami miiw sira me ookowen.

⁵Ni Yeesus Krai opora baliwep opu naep-na akimowa yaawerow marew opora opiman nain sira unowa fainiw ane-kurumeka, sira eliwa-pa ikowa, Mua Maneka baliwep amisarowa, ⁶mia niam kaikap mia kookalowa me ookowa, kekanep kekelka ikowa, Mua Maneka ekima maneka opami eliwa ikowa, ⁷niena teeria yiamun epia-ke niam naemi niam kookalem-ikowa ne mua oko pun wia kookalemi wia saliwam-ikowa. ⁸Ni yiena Maneka Yeesus Krai baliwep amisareman. Neemi sira unowa nain ookam-ikowen-na sira nain-ke kema-pa niar taanem-ikaeya me asipap-puowen, anane makenarem-ikainon. Naeya ni baliwep o uwomowen. ⁹Ne mua sira unowa nain me ookiya nain mokok opa saarik, maa me urufiya. Ne fain kema irinarek, yo pina onomakem nain iiriw efar iirarek, naap me maiya.

¹⁰Naapeya emar unowik, ni Mua Maneka nia faremi nia nanikak nain maken akena arinok naep kema iikirap kekanep naap onam-ikeka. Ne ni naap ookam-ikowen-na me wakiowen, weetak akena. ¹¹Naemi yiena Maneka Yeesus Krai eena yia aawok nain ona manek akena nia kookalep anane ikaiya kemena neeke nia wuinon. Naeya ni anane eliw ikowen.

Mua Maneka opora-ke yia parinarowiya

¹²Makena, ni maa unowa nain iiriw amisareman, ne opor makena kekanowa opam-ikeman, nain ni eliw ikeka naep yo anane sira nain maemi nia kemapawam-ikainen. ¹³⁻¹⁴Yiena Maneka Yeesus Krai baliwep kema yiek, yo miiwa fain piipuowa epa efar weeserikua. Naapeya yo aakisa mokok enuma ikem fainiw eliw ikowa opora nain nia enumam-ikainen. ¹⁵Yo iiwawow marew naap nia maakem-ikainen. Naeya ikoka yo umemkun ni maa nia maakomakem nain kema-pa ikowen.

¹⁶Aria yiena Maneka Yeesus Krai ona kekanowa ne nainiw ekapowa nia maakemik nain me yiena mua kema-pa siisiarep nanar imenap nia ookomamik. Weetak, i yiena mokok onaiya kekanowa ne parina wiar urufamik. ¹⁷Iir nain i ema nan ikemkun ona Wiawi Mua Maneka-ke unum maneka ne kekanowa iwok. Feenap, Mua Maneka parin maneka-ke imenaremi iwakara-ke o maemi feenap maek, “Fain yena Muuka, kema muneka-ke, yo manek akena kookaliyem nain-ke,” naap maek. ¹⁸Maa urufap miimamik nain i ema-pa nan ikok yiena kakeniw mua iwakara iinan-pa oreya miimamik. Maa naap imenareya epa nain ema eliwa naimik.

¹⁹Ne wi Mua Maneka profet pun opora kuisow nain maem-ikemik. Ne yiena kakeniw maa urufamik nain wi opora nain makena wiar arek. Naapeya ni opora nain baliwep wiar miimam-ikowa-ke eliw. Moram opora nain parina saarik, epa kokoma-pa parina iwiya naap. Ni opora nain anane maneka kema suuwam-ikeka. Naap kema suuwam-ikaiwkin epa wiimow mokoma nain-ke imenaremi kema iiwawun nia

parinarowinon. ²⁰Ni maa fain manek akena amisareka, Mua Maneka profet opora maemi siisimemik nain me wiena kema-pa onamik, weetak. ²¹Moram opora naap nain mua kema-pa-ko me imenariya. Ewar Eliwa-ke Mua Maneka opora kema wiem-ikaeya wiar maemik.

Wi somek mua samora

2 ¹Iiriw i Isrel teeria mua papako wia peeskimemi i profet-ke wiam maemi wadolalem-miawemik. Ne ikoka pun sira naapiw, wi mua papako i somek mua-ke naap maemi opora nia maakikuan. Wi opor makena saarik aakunemi nia kiri-kiripami wadol era nia pikiwemi nia oro-boonowikuan. Yiena Maneka eena wia sesenarep aawok nain wi yiena Maneka-ke me naemi mikikira iwimik. Naeya wiena sira onimik nain-ke ikoka wiar kireya oram samor aawep-puikuan. ²Ne mua unowa wi wiokami mia kookalowa sira samo-samora onikuan. Aria neeke wi sisin mua era makena nain yiar poraikuan. ³Wi somek mua nain maamuma niar aawow muuta nain wiena wadol nanar imenap nia maakikuan. Wi naap onimik nain kirowa wiar ikua, Mua Maneka wia samorowa nain wiena wiam ekerap-puimik. Ona epa kerereya oram wia samorap-puinon.

⁴Ni Mua Maneka sira onam-ikua nain kema suuwiman-i? Feenap, iiriw eker a ensel papako sira samora onamik nain os-ke mokokiwi me ikua, weetak. Wia samorami epa kokom tenowa-pa wia wuak. Wi nan ikok wia samorowa epa nain arewap ikemik. ⁵Ne iiriw eker a Noa ikowa-pa wi emeria mua Mua Maneka opora mikikira iwemi pina samor akena onam-ikemik nain mokokiwi me ikua, weetak. Eka luuma maneka sesekami wia welawak. Noa mua kakeniw ikua, ne Mua Maneka opora wia maakem-ikua. Naapeya Mua Maneka-ke ona teeria ikur okaiwi-pa erup ne ona me wia samorak. ⁶Aria iir oko, owowa erup, Sodom ne Gomora, pina wia kiripomami mukuna sesekeya awep iiwawun saakiarek. Wi emina kekanimik nain naap urufap kema aawep maikuan, is pun sira naap yia oninon, naap maikuan. ⁷Iir nain Lot ona teeria onaiya wia aawep pikiwep-puap owowa erup nain iiwawun samorak. Moram Lot waisow mua eliwa ne kakeniw ikua. Owowa nain wiamiya ikok sira samora onam-ikemik nain wiar urufap kema-pa sirirem-ikua. ⁸O mua eliwa nain wi wiamiya ikok wi sira samora nain anane wiar urufap ne miimap kema iiwawun samorarem-ikua. ⁹Aria Mua Maneka sira naap onam-ikua. Naapeya i feenap amisaremik, aakisa wi mua kakeniw ikemik nain akimowa-ko wiar imenarinon-na ona wia asipeya eliw ao-wuepikuan. Ne wi sira samora onimik nain wia mekawowa naep wia kaikap epa neeke wia kiripomami wia samorinon. ¹⁰Wi mua samora ikoka samor aawikuan, nain wi somek mua nain-ke wiisak, samor akena aawikuan. Wiena mia kookalowa ookami sira samora onimik nain ne wi Mua Maneka opora fienimik nain.

Wi mua nain wienna kookalowa-pa sira-sira onami unuma wiam pirimik. Naap onami wi iinan ensel kekanowa akena nain wia keker opow marew wia firekimik. ¹¹Ne wi ensel Mua Maneka-ke kekanowa wiewa kekanowa onaiya ikemik. Eenapeya wi miw mua kekanowa wiar nomakemik. Nain wi ensel papako Mua Maneka mokoka-pa wi ensel kekanowa nain pina ariman wiar wuami me wia firekimik. ¹²Ne wi somek mua nain-ke weetak, kekanowa me wiar amisarowa wia firekap-puimik. Wi nain maa eneka eena kema marewa nain saarik. Wi mua naap nain, wienna mia kookalowa muutiw ookimik. Naapeya ikoka samor aawikuan, maa eneka asia eena kanuep opap ifakimimik naap.

¹³Wienna sira samora nain-ke kiremi wia samorinon. Wi sira feenap onimik. Mia kookalowa ookami amirik maneka pun mia kookalowa sira-sira ookami palanow manekiw ikaimik, nain maa eliwa-ke naimik. Wienna sira nain maa tumina saarik ikaiya. Ne aria ni kema kuisow ikok niam firimep maa enimiman nain wis pun niamiya maa enimimik. Nain wi sira samo-samora onimik nain-ke, naapeya ni maa enowa nain niar tumina arowimik. ¹⁴Wi emeria mokoka wia kuimik ne uruw mia me kaikimik, pina anane maneka onimik. Naap onami wi mua kema garia nain pina onowa wia mufem-miawimik. Ne wi maamuma, maa muutitik kookalow manekiw ikowa nain wiam paayap anane naap onimik. Wi teeria nain Mua Maneka yoowa wiowa nain iiriw maep-puak. ¹⁵Wi era makena iiriw piipuamik. Ne Beor muuka Baalam sira onak nain era wiar ookimik. Mua nain maamuma aawow muuta nain sira samora onekam naep ikiwok.^a ¹⁶Nain onowa ikiwem-ikaeya ona donki-ke mua saarik aakunemi sira samora nain ariman maakemi amukarek. Maa eneka-ko me aakunimik, nain mua saarik maakemi o kema pukow marew sira samora onowa ikiwok nain era wiar puukak.

¹⁷Aria wi somek mua nain wi eka arona iiriw saanarek naap. Ne oko pun feenap saarik, ipia kokoma teniya, nain ewar asia-ke wuunoweya ipia me oraiya. Wi nain Mua Maneka epa iiriw wia wuap-puomak, epa kokom akena nain. ¹⁸Mua papako sira samora teeria-pa wiar ikok aakisa fan wia piipuap Yeesus Kraik ookimik. Ne wi mua samora nain-ke mia kookalowa sira manekiw ookuk naep opor maken marewa nain aakunemi piik irami kema wia mikami wia wakiowawimik. ¹⁹Feenap wia maakimik, “Ni i sira yiokowen-na maa unowa eliw onowen, opor marew ikowen,” naap maimik. Nain wi wienna pina onam-ikaimik nain-ke iiriw wia kaikap ikua. Moram sira naap ikua, no maa mauwa kema manekiw ikok onin

^a 2.15 Owow oko saria wi Isrel samor aawuk naep Baalam sesenareya wi Isrel opor samora wia onowa ikiwok. Ikiwem-ikok ona donki-ke ensel oko urufap ikiwowa miatinep kekanep iimarek. Ne ensel nain donki opaimika-pa Baalam opora maakek. Nanar nain Namba 22.4-35-pa eliw urufowen.

nain maa nain nena iimarow mua saarik, nain-ke kema nefa mikeya pina onam-ikainan. ²⁰Ne wi mua yiena Maneka Yeesus Krai eena yia aawok nain opora wiar opap miiw sira onowa miatinimik. Nain wi teeria nain-ke afila wuomiwkin wiokap-na samor akena aawikuan. Wi iiriw Yeesus Krai me amisarowa ikemik nain pun samor ikemik, nain ikoka wi iiwawun samorarikuan. ²¹Moram wi mua naap nain Yeesus Krai opor makena me wia maakiwkin amisarep ikekamik-na eliw-yon. Nain wi amisarep Yeesus Krai ookam-ikok piipup on a sira wia maakek nain mikikira iwemik. Naapeya wiisak, wi iiwawun samorarikuan. ²²Naapeya Mua Maneka opora oko eena feenap maek nain makena,
 “Siowa eena ookakimep-pup on a nainiw eniminon.”

(Gutpela Sindaun 26.11)

Ne opora oko feenap ikua,

“Waaya eena iiriw yasuwamik nain ikoka nainiw ikiwep sipa yakinon.”

Yiena Maneka ikoka nainiw ekapinen naek

3 ¹Aria emar unowik, yo aakisa parosifa nia siisimomiyem fain-ke erup ariya. Ni sira kakeniw ikowa nain kema iikirap kema suuweka naep nia naiyem. Nain nia kemapawowa naep parosifa fain siisimiyem, ne iiriw siisimem nain pun naap. ²Wi iiriw profet opor unowa maem-ikemik nain kema suuweka, ne opora yiena Maneka eena yia aawow mua nain wi aposel wia maakeya nia maakemik nain pun kema suuwam-ikeka.

³Ni uru-urufap, fain baliwep akena mokakeka, feenap, miiwa weeserow epa arem-ikaeya wi mua papako wiena wadol sira ookimik nain-ke i maa makena maemi ookimik nain yiar amap-niirikuan. ⁴Feenap maikuan, “O nainiw ekapowa maek nain makena ekapok-i? I yiena auwa teeria o arewap ikemik nain iiriw umemik. Nain maa unowa ona iiriw miiwa onaiya imenarek naapiw akena ikomakek,” naap maikuan. ⁵Naeya wi nain maemi Mua Maneka miiw maa muutitik urufam-ikaiya nain kema suuwowa miatinimik. Feenap ikua, Mua Maneka-ke maeya aapereka ne maa muutitik imenaromakek. Ne epa unowa nain eka-ke muep ikaeya os-ke eka nain suuw-ekap kame kuisow wueya miiwa imenarek. ⁶Ne naap ikok eka nain-keriw miiwa muemi emerua mua wia samorak. ⁷Ne aakisa miiwa i ikemik fain Mua Maneka ona naap maep miiwa fain urufam-ikaiya. Wiimar iiwawun, emerua mua wia mekawow epa-pa os-ke mukuna sesekeya miiwa fain kukumakinon. Ne wi o me ookimik nain iiwawun samorarep mesenalikuan.

⁸Nain emar unowik, ni maa kuisow fain kema suuwam-ikeka. Mua Maneka i saarik fofa me tuuniya. Feenap, fofa kuisow mokoma unowa akena naiya, ne mokoma unowa akena fofa kuisow naiya. ⁹Ne ona

ekapowa maek nain i mua-ke maimik, ewur ekapekak oo. Nain feenap, ni me samor aaweka naep nia arewiya. Ni unowiya iiwawun kema kiriwkin maa nain onap-puinion. Naapeya mokoma tuunowa maimik nain o weetak.

¹⁰Yiena Maneka ekapow fofa nain oram imenarep-puinion, ikum mua saarik. Iir nain aapereka wilik naemi paranemi iiwawun mesenalidon. Neemi maa unowa aapereka-pa ikomakek nain awemi samoraridon. Ne maa muutitik miiwa-pa ikomakek nain pun iiwawun awemi mesenalidon.

¹¹⁻¹²Miiwa ne iinan maa unowa ikoka Mua Maneka maek naap akena samoridon. Ni nain kema suuwami aakisa sira kamenap ikowen? Ni Mua Maneka fofa maek nain arewami ewur ekapinok naem-ikok osiw ookami baliwep ikowa-ke eliwa. Makena, fofa neeke aapereka maa unowa mukuna-ke kuumeya awemi iiwawun samoraridon, ne miiw maa muutitik awemi eka aremi mesenalidon. ¹³Nain Mua Maneka eena owow iinan enuma ne miiw enuma yia maakep koonowak. I owowa eena anane kakeniw ikowa nain neeke ikowa arewap ikaimik.

¹⁴Naapeya emar unowik, ni fofa nain arewami Mua Maneka mokoka-pa pina marew akena ikaiyen naeka. Neemi o wameiya kema epaskun ikau naep naap topialem-ikeka. ¹⁵Yiena Maneka miiwa ewur me samoriya nain kema suuwap feenap maeka, i iiwawun yia aawowa naep naap onak, naap maeka. Aria i uuwow epaskun Pol Mua Maneka-ke amisa iweya ni parosifa nia siisimomami nain pun maek. ¹⁶O parosifa unowa nia siisimomak nain maa nain maemi opora kuisow fainiw nia maakek. Opora eena maek nain ara papako kemena wiar aawowa yoowa. Ne wi mua amis marewa ne Mua Maneka opora wiar ookowa me kekanimik nain-ke Pol opora nain wiar maemi kiri-kiripimik. Mua Maneka opor unowa nain pun naapiw onimik. Wi mua nain maa anima mia-pa wiam wuap-puamik.

¹⁷Aria emar unowik, ni maa nain iiriw amisareman. Naapeya ni niam uru-urufami, wi mua eena sira puukimik nain-ke me nia oro-boonowuk. Naeya ni aakisa eliwa ikaiman nain naap akena ikeka. ¹⁸Yiena Maneka Yeesus Kraisa eena yia aawok nain nia kemalep nia asipam-ikaiya naap manekarem-ikainok, ne ni amisa wiar aaweman naapiw ikim-ikeka. Aria o kekanowa ne unum maneka aakisa naap ikaiya, ne anane pun naap ikainok. Makena.